

Marinpex a firma protocol cu gobierno

Grupo Whiteford a cai afo

ORANJESTAD(AAN)—Ayer tardi Sr. Betico Croes a duna relato di e reunion cu e delegacion di Aruba consistiendo di su persona, ministro Don Mansur, diputado John v.d. Kuyp, Ing Tabare Monzon, a tene na Coral Gables cu un delegacion di Exxon, pero no solamente cu representantenan di ECA y di Coral Gables, pero tambe di Exxon Internacional.

Tabata presente tambe un delegacion di Marinpex representa pa su director presidente y su banquero.

Di CDC tabata presente pero no den e reunion Sr. Peter Whiteford y Jerry Fuentes kendenan a trata di pone e package hunto.

A reuni diabierna anochi te den oranan di madrugada y diasabra di mainta te atardi.

Diabierna anochi cu e grupo di Whiteford y grupo di Marinpex, y diasabra cu Exxon, Marinpex y delegacion di Aruba.

"Den ocasionnan anterior mi a yega di declara cu mi ta pesimista encuan to e re-apertura di e refineria te cu mi a bisa cu mi ta dune un porcientu di posibilidad, pero cu e 1 porcientu ey nos ta bay sondea a fondo. Tabata tin dos grupo, e grupo di Genoil y e grupo di Peter Whiteford. Genoil manera ta conocí a cay afo, despues a keda e grupo di Whiteford.

"Despues di hopi reunion y analisis di e situacion door di e gruponan concerni, nos por bisa cu Exxon, Marinpex y e delegacion di Aruba a yega na un protocolo di acuerdo cu ta consisti di varios punto. Esaki ta significa cu e grupo Whiteford a cay afo den e studio aki. Ami y nos ta mira algo cu ta trece un claridad y kizas un speranza den e situacion, aunque cu personalmente cu aunque awor aki nos ta mira algo cu por dunabo cierto grado di optimismo, ami ta mire cu e ta mengua mi grado di pesimismo cu verdaderamente awor aki a drenta un grupo den e package cu ta sumamente serio y respeta pa Exxon. E grupo serio aki pa Marinpex, representa pa su director y banquero, e delegacion di Exxon y delegacion di Aruba, a yega na un protocolo di acuerdo cu a ser firma diasabra atardi den nomber di gobierno di Aruba pa Sr. John v.d. Kuyp y mi persona y Sr. Luther den nomber di Marinpex" Sr. Betico Croes a splica.

E protocol ta menciona cu dentro di 30 dia dos estudio di factibilidad lo wordo haci.

Segun Sr. Betico Croes, dialuna awor ta yega Aruba un delegacion di Exxon y diamars mainta dia 19 tin un firmamento di un protocol di acuerdo cu Exxon den sala di Bestuurskantoor, y posiblemente Sr. Luther di Marinpex

tambe lo ta presente.

Despues di 19 di november ta cuminsa core un periodo di 30 dia pa haci dos estudio di factibilidad. Un ta pa e condicion fisico di e refineria.

"Gert Luther cu na e momento aki ta un persona cu ta ser respeta pa Exxon y cu tin su contactonan cu varios pais petrolero y cu ta dispuesto di haci tur su esfuerzonan pa haya un pais petrolero participa den e refineria, ta exige un estudio encuan to condicion fisico di e refineria, cuanto ta costa pa start e refineria atrobe y si e refineria por wordo gestart. Exxon ta bay di acuerdo y hunto cu Marinpex ta bay busca un firma renombra pa haci e estudio aki. Exxon y Territorio Insular lo bay paga e gasto pa e estudio aki", Sr. Betico Croes a splica.

E segundo estudio cu lo wordo haci ta un estudio di factibilidad ariba terreno di mercadeo, ariba e productonan refina.

"Nos a puntra Exxon si e kier participa eyden no solamente den e estudio pero tambe pa e financiamiento, Exxon a rechaza esaki pasobra e ta un conflicto di interes. Pasobra ta obvio cu e pais cu lo bay ser suministrador

di petroleo y kizas participa den tuma miento over di e refineria, pues ser propietario, no ta un pais vecino, pero mas bien un pais di Medio Oriente. E ora ey e productonan mester wordo mercadea den nos region y pa Exxon esey ta un conflicto di interes. Anto nos a yega di acuerdo cu Marinpex cu nos conhuntamente a base di 50/50 porcientu pa paga e gastonan, lo haci un estudio di factibilidad di mercado pa productonan refina. Si e dos estudionan aki resulta positivo, Marinpex ta cometi den un compromiso cu Aruba pa trece un solucion, pero a base di condicionnan aceptable pa tur dos grupo-componentenan cu lo ser doño o co-propietario den e refineria cu lo opera e refineria Lago.

Marinpex ta compromete su mes pa suministra e refineria aki cu e crudo y gobierno ta compromete su mes na momento cu yega na un acuerdo total cu Exxon, pa pasa e refineria aki na e propietarioan nobo pa un dollar, e mes prijs pa cual gobierno di Aruba a haye", ta locual Sr. Betico Croes a trece dilanti ayera.

Entretanto Sr. John v.d. Kuyp, Sr. Betico Croes, y Diputado Nel Oduber a firma un peticion pa reunion publico di Eilandsraad, cu lo mester wordo tene no mas tarda dialuna awor, pa asina haya aprobacion di parlamento, comoquiera cu dia 19 tin firmamento cu Exxon, Sr. Betico Croes a trece dilanti tambe.

Binti agente policial hulandes lo bin traha na Aruba

ORANJESTAD (AAN)

For di Hulanda a bin e noticia cu Comisario Interino Rolando Peterson ta hibando deliberacionnan y entrevistanan actualmente pa atrae entre 18 y 20 agente y oficial di Polis Hulandes pa bin traha na Aruba despues di su Status Aparte.

Si anteriormente e Bond di Polis na Hulanda a desaconseja su miembronan pa tuma puesto na Antillas, debi na e trato indesea cu nan lo a haya na Curacao den pasado reciente, e tono a cambia por completo awor cu ta trata di Aruba como nacion dentro di Reino Hulandes.

Dia 8 di e luna aki e Bond a publica den su organo di publicidad cu e ta aconseja su miembronan pa acepta e puesto cu los ser ofreci pa Aruba. E Presidente di e Bond a laga sa bon cla cu ya e impedimento nan cu tabata existi antes

pa a emiti e opinion cu nan no mester acepta e puesto a cambia.

Aruba ta hayando tur clase di cooperacion di parti di Gobierno na Hulanda pa atrae e agente y oficialnan, y proximamente lo culmina cu entrevistanan di esnan interesa. Ya caba tabata tin bastante interes y aplicacion di varios oficial halto y personal subalterno pa e puestonan cu ta ser ofreci na Aruba.

Tanto De Graaf como Cees Bakker ta dunando tur cooperacion pa Comisario Roland Peterson haya e agentenan cu el a bay busca.

Den Volkskrant a sali un articulo recientemente den cual e posicion nobo di e Bond di polis a sali publica. Segun tur informacion ricibi di Hulanda, e cooperacion y deseo di yuda Aruba den e cuestion aki ta optimal y pronto e isla lo tin agentenan y oficialnan di Polis Hulandes den servicio.

E.E.G. y Exxon por financia master-plan turistico pa San Nicolas

Segun Sr. Benny Nisbet

ORANJESTAD(AAN)—Durante conferencia di prensa di PPA ayera tardi Sr. Benny Nisbet, elaborando ariba e master-plan turistico proyecta pa San Nicolas, a muestra cu tanto E.E.G. como Exxon por yuda na financia e infraestructura di e plannan.

Segun Sr. Nisbeth, durante su presencia na Belgica aña pasa y tambe na Juni ultimo, ora cu el asisti na conferencia di 1ste en 2de kamer na Hulanda, el a puntra EEG cual proyectonan por ser financia facilmente y e contesta na su pregunta tabata cu financiamiento ta posibel riba infraestructura turistico. Mirando cu EEG tin fondo an dis-

ponible, Sr. Nisbeth ta di opinion cu si tin un gobierno cu sa di probecha di oferta aki, fondonan por ser haya pa realiza e proyecto. Tambe Sr. Nisbeth a bisa cu Exxon a bisa cu lo e ta dispuesta pa yuda inyecta placa pa finnan economico. Segun Sr. Nisbeth, Gobierno di Aruba no mester laga e oportunidad aki pasa. Exxon a funciona 60 aña na Aruba y lo no tin duda cu en realidad nan lo por hasi tal.

Entre otro P.P.A. ta di opinion cu e plannan aki ta realisable, den cuadro di e fondonan necesario, gobierno por cumpra e propiedadnan di e hendenan cu lo kie: bende nan

Sigui lesa pag. 4